

Fasnacht 2017



Mir zwai – mir sin zwai Pfadibuebe und sinn allzyt bereit
und mir vollbringe alli Daag e gueti Tat zu zwait

Mir düen bi dr Swiss – in allne Flieger – e Schüüfeli verstaue
Denn kenne die, wenn si Zwischelände, weenigschtens e Iglu baue

Wenn ich aim saag – ich find – dass du e Ziegefigger bisch
Denn isch's e bitzeli kritisch – wenn das dr diirggisch Präsi isch
E Belaidigung – kaa das nid syy – drum isch das nyt prekäär
Denn s'köönt jo syy – dass di Geiss – no yverstande wär

Zum e Fuessballspiel – zgwünne – muesch die richtige Spieler wääle
Und Taktik isch au no wichtig – die derfsch im Match denn nid verfähäle
E Profi-Trainer – wie dr Jogi Löw – hett vuyll gleert us schlaue Biecher
Drum hett er au – die richtig Hand und oft e guete Riecher

Dr Eric Wäber nimmi im Grosse Root – für ihn e Katastrophe
Sythär kenne mir zwar guet – aber är z'Nacht nimmi schloofe
Syy Doggter hett ihn – untersuecht – s'Resultat liggt uff em Tisch
Das sogar – d'Bluetgruppe – vom Wäber, Null positiv isch

In China stoot e Muur – gross – und hoch – und breit
D Chinese hän's Problem erkannt – hett sich dr Donald gsait
Sone Muur – nützt offesichtligg – sait dä ohni Verstand
Will d'Chinese hän jo au kaini – Mexikaner in ihrem Land

Kenne Sie s'Äffle und s'Pferdle – au no vom Fäärnsee
Friener hän – mir die zwei – amme au no gärn gsee
Doch jetz sin uns – die beide aber – so richtig fescht verlaidet
Mir glaube dr Dürr – und d'Ackermaa hän sich – als die zwei verglaidet

Im Internet hän mir welle – e Ferieschnäppli bueche
Und sin bi 400 Ferieanbieter e Hotel im Netz go sueche
Nachere Wuche no 50 Aagebott – das söll no aine raffe
Zwai Wuche spööter hän mir gmergt – mir mien wieder go schaffe

Zwei Räägewürmli – drei Hoppelhäslil – jo die woone deert
Mir wänn au nid – dass es d'Faadewürmli und d'Kääferli z'fescht steert
Und wenn denn no zwai Schwarzkehlchen ihr Liebesnäschent deert finde
Denn mache mir das Schwingfest halt – nid im Aescher Fäld hinde

Züri brucht e neue Name – und zwar ein mit Rasse
Sommerau – hän mir uns dänggt – würd prima zur Stadt basse
E Namenswäggsel isch ächt böimig und au no richtig schlaue
Denn Züri isch im Winter scheisse – und im Sommer au

Dr Shiva, dr warm Indianer wott jetz no go jasse
Das würd jo prima zu däm Samschtigsjasse basse
Was wänn mir denn für e Jässli kloppe – e Coiffeur oder ächt e Schiiber

Denn sait si Partner, «Ach liebe Mike» e Schiiber wär mir lieber

E Schiiber – meint dr Mike – bisch du nid ganz bache

Und wenn i denn zwei Dame han – weiss ych nid was mache

Dä will doch nid vier Buure wiise – dr Shiva isch e fräche
S'goot ihm doch numme drum – e Büürli mit sinere Eichle z'stäche

Mittlerwile isch e riise Stimmig – im Studio mien alli lache
Jetzt froogt dä no si Partner – «söll ich's dir obe abe oder unde uff mache?»

Do seit dr liebi Mike ganz glase und e bizli stumpf

I bi schwach – ha nüd in dr Hand – aber mini Schälle di sin Trumpf

Dangscheen für die glatti Zyt mir hän viel zämme glacht
Drum gön mir zwei jetz witter... und winsche «e scheeni Fasnacht»

Wottsch au by uns bänggle?
Uff www.vsg-basel.ch erfahrsch meh!

